

26 Ogos 2016

KENYATAAN MEDIA

*oleh Dato' Ir. Jaseni Maidinsa,
Ketua Pegawai Eksekutif,
PBA Holdings Bhd (PBAHB) dan
Perbadanan Bekalan Air Pulau Pinang Sdn Bhd (PBAPP)*

FOKUS KEPADA JAMINAN DAN KELESTARIAN AIR MENTAH SERANTAU

PULAU PINANG, Jumaat (26/8/2016): Negeri-negeri di wilayah utara Malaysia perlu memberi fokus kepada jaminan dan kelestarian sumber air mentah jangka panjang serantau, dan bukannya mencari 'keuntungan air' yang tidak berasas.

Perlu diambil perhatian bahawa Kedah tidak 'membekalkan' air mentah kepada Pulau Pinang. Pulau Pinang memperolehi air mentah dari Sungai Muda, sungai yang mentakrifkan sempadan antara kedua-dua negeri. Kita menggunakan sumber kita sendiri untuk mendapatkan air dari bahagian sungai sebelah sini, iaitu bahagian hilir daripada 14 muka sauk rawatan air Syarikat Air Darul Aman (SADA) dan 1 muka sauk pengairan Jabatan Pengairan dan Saliran (JPS) di Kedah.

Oleh itu, sejak tahun 1973, Pulau Pinang tidak membayar kepada Kedah untuk air mentah yang kita peroleh dari Sungai Muda setiap hari di dalam keadaan biasa.

Dalam 6 bulan pertama 2016, Perlis, Kedah, Pulau Pinang dan Perak menghadapi musim Super El Nino yang agak mencabar. Terdapat ancaman krisis air secara meluas yang akan memberi kesan kepada 4 juta orang dan menyebabkan ribuan perniagaan kerugian berbilion-bilion ringgit.

Bagi mengelak catuan di Pulau Pinang, Perbadanan Bekalan Air Pulau Pinang Sdn Bhd (PBAPP) terpaksa melaksanakan pengawalan secara berhati-hati ketika cuaca kemarau. Dalam pada itu, berlaku juga insiden catuan di negeri-negeri Utara lain.

Apabila kapasiti efektif Empangan Beris dan Empangan Muda (yang direka untuk melepaskan air ke dalam Sungai Muda ketika musim kering) jatuh ke

tahap kritikal, Pulau Pinang terpaksa membuat saranan kepada Kerajaan Persekutuan untuk menanggungkan pengairan, melaksanakan pembenihan awan besar-besaran dan menguruskan pelepasan harian secara efektif dari empangan ini, di samping menggalakkan rakyat untuk jimat air.

Super El Nino telah jelas memberi peringatan kepada kita apabila rizab empangan jatuh ke paras kritikal, wang tidak boleh membeli rizab air mentah tambahan bagi Perlis, Kedah, Pulau Pinang dan Perak Utara dalam jangka pendek.

Sehingga hari ini, semua empangan utama di bahagian utara belum pulih sepenuhnya daripada kesan Super El Nino. Melihat ke hadapan, kita tidak tahu bila Super El Nino akan melanda kita lagi.

Mengutamakan Solusi Air Serantau

Sejak bulan Mei 2016, Kerajaan Negeri Pulau Pinang dan PBAPP telah berulang kali menggesa Majlis Sumber Air Negara (MSAN) yang dipengerusikan oleh Timbalan Perdana Menteri, untuk memberi keutamaan kepada penyelesaian air mentah serantau bagi 4 negeri wilayah utara.

Cadangan yang telah kita dibentangkan dan dinyatakan di dalam surat rasmi kepada MSAN termasuk:

1. Pengharaman segera semua aktiviti pembalakan di kawasan tadahan Ulu Muda dan mewartakan kawasan-kawasan ini sebagai kawasan tadahan air dan dilindungi oleh undang-undang.
2. Membayar pampasan kepada Kedah dengan dana Persekutuan untuk melindungi dan memelihara kawasan tadahan Ulu Muda, selepas kawasan-kawasan ini diwartakan.
3. Melaksanakan Skim Penyaluran Air Mentah Sungai Perak (SPRWTS) dalam tempoh 5-7 tahun, bagi memenuhi permintaan air mentah Perak dan Pulau Pinang sehingga Tahun 2050.
4. Memperuntukkan dana Persekutuan untuk SPRWTS untuk manfaat kedua-dua negeri, berdasarkan perjanjian Inisiatif Penstrukturan Semula Perkhidmatan Air Negara (NWSRI) pada tahun 2011, yang ditandatangani di antara Kerajaan Persekutuan dan Kerajaan Negeri Pulau Pinang.

5. Menggesa Kerajaan Persekutuan untuk memainkan peranan yang lebih proaktif dan aktif dalam melindungi, mengurus dan mengoptimumkan semua sumber air mentah di wilayah utara untuk manfaat bersama Perlis, Kedah, Pulau Pinang dan Perak Utara, sejajar dengan konsep Koridor Ekonomi Wilayah Utara (NCER).
6. Menyediakan pelan pengurusan krisis air bagi Wilayah Utara dengan memanfaatkan semua sumber air mentah yang ada, untuk mengurangkan risiko, ancaman dan kesan negatif musim kemarau berpanjangan pada masa akan datang.

Melindungi Kepentingan Negara

Terdapat kira-kira 4 juta rakyat Malaysia yang tinggal dan bekerja di Perlis, Kedah, Pulau Pinang dan Perak Utara. Sejak tahun 2008, Pihak Berkuasa Pelaksanaan Koridor Utara (NCIA) telah mempromosikan NCER untuk menjadi wilayah ekonomi bertaraf dunia secara keseluruhannya, di samping memastikan pembangunan sosial dan mapan serta pertumbuhan ekonomi.

Pada tahun 2015, 4 negeri NCER menyumbang kira-kira 15.8% daripada KDNK negara sebanyak RM1.012 trilion. Pada 13 Ogos 2016, dilaporkan bahawa NCER memperolehi pelaburan sebanyak RM4.47 bilion dalam 6 bulan pertama 2016.

Pada 31 Ogos 2016 minggu hadapan, kita akan menyambut Hari Kebangsaan ke-59 Malaysia dengan tema 'Sehati, Sejiwa'. Mungkin, ia adalah masa yang baik untuk semua untuk melihat semula dan menumpukan kepada kepentingan menjamin kelestarian bekalan air di NCER secara keseluruhannya, bagi melindungi kepentingan nasional.

Air adalah sumber penting untuk kehidupan harian dan pembangunan mampan. Tanpa air mencukupi, NCER tidak boleh maju dalam cara yang mampan. Oleh itu, kita perlukan pembiayaan dan tindakan daripada Kerajaan Persekutuan sekarang untuk melindungi kawasan tadahan Ulu Muda dan mengoptimumkan potensi Sungai Perak sebagai sumber air mentah serantau.

Terima kasih.

*Dato' Ir. Jaseni Maidinsa,
Ketua Pegawai Eksekutif,
PBA Holdings Bhd (PBAHB) dan
Perbadanan Bekalan Air Pulau Pinang Sdn Bhd (PBAPP)*

Hubungi : Puan Syarifah Nasywa bt Syed Feisal Barakbah
Unit Komunikasi Korporat
Tel : 04-200 6607
Email : syarifah@pba.com.my